

226

## Widder die gesuchte.

Wer gesuchte hat ynn den gliedern / der brenne eins  
Beyers gebein zu puluer / vnd mach mit eyerklar dar-  
aus ein pflaster / legs an die stat da dir wehe ist / Odder  
nym alt schmer / new wachs vnd baumöl / salbe den  
gliedersüchtigen damit / es hilfft. Ein anders.

Nym die schwarzen rinden von einer pircken / vnd  
heydricht / auch dorn mies / sends yn wasser vnd bade  
darynnen.

Wastu kalte füsse / vnd stiche ynn beinen.

Nym erdpeerkraut / peipus / wermut / gamillen / glei-  
ch / ynn ein secklein / sends wol / reib vnd wasch die bei-  
ne oft damit / es hilfft. Wenn ein die glieder erla-  
men / der nem rinden vom baum / genant hagenbuch /  
send die vnd bade darynnen. Item / nym nüsbaum-  
blettersafft vnd alt schmer / lass zusammen / vnd salbe  
dich gegen dem feuer.

Widder das gesücht.

Nym widderthat / send das kraut ynn wasser / vnd  
wassch damit die stat / da dir wehe ist zc.

Item / empfindestu des gesüchts / odder stiche ynn  
beinen odder armen / vnd sihest doch nichts schenba-  
res / so ist das gewönlich ynn dem gebeinschlossen / a-  
ber du empfindest des ynn dem fleisch darbey. So  
nym tauben kot / zwey teil / den dritten saltz / misch  
das zusammen / vnd thu es ynn ein leinen sack / nee es /  
das es nicht zu hauffen kome / legs denn auff ein rost /  
lass wol erhitzen / vnd gens denn guten essig darauff /  
strawe gestossen zymetrinden darauff / das es das flei-  
sch nicht fresse / binds also warm vber die schlos / am  
nehesten bey der siechen stat / Ist es am arm / auff die  
achffel / Ist es ym bein / auff die lenden / Ist dir ym  
rücke

¶ ij

rücke